

Vun driweriver

erscheint auf www.lenauheim.de

monatliche
Erscheinung

Dezember 2010

von Helen Alba

Owacht gin beim Knete!

Es naht die Weihnachtszeit, do han ich anfang zu studiere, was alles gekocht, gebackt un natierlich a inkaaft gin muss. Uf meiner Lischt steht a Kranzkuche. In manchi Ortschafte Sterzekuche genennt. Heitzutach saat mer jo bei uns do Kosonak, awer meiner Meinung noh is des ke Kranzkuche.

Un wie die Oma de gemacht hat, so han ich mer des abschaut. De Gerwetaich mit vill Aijer un Milch, Zucker, Eel git erscht ingemacht, gekneet un wann er gang is git nochmol so lang gekneet, bis ke Taich me an de Händ picke bleibt. Beim Kneete muss die Kich warm sin – die Oma hat se immer vun drin aus zugsperrt, dass jo kenner rinkummt un Zugluft is. Weil die soll schade. Noh wieder e Weil gehn gelosst. Jetzer kummt de Taich ufs Nuddlbrett, werd in drei Teeler gschniet, die Teeler gin gerollt un dernoh wie e Zopp gflocht. Des Ganzi kummt ins Blech, bleibt wieder e Weil stehn bis die Rehr heiss genuch is un git dann mit Aijerweiss ingschmiert un e Stund lang bei mässicher Hitz backe gelosst. Kummt warmer in e Tuch un schmeckt einfach himmlisch.

Bei uns is de Kranzkuche immer einfach gebackt gin, also ohne Ziwewe, Nusse oder Rahat. Un anschnied han mer ne immer, wann mer aus der Metternacht hem kumm sin. Derzu e warme Milchkaffee getrunk. Natierlich mit Zikori.

Schneeballespille

Friehier sin die Leit owets in die Spinnstub gang. Es war an so eem Winterowet, wie die Männer ufmol anfang han zu tuschle, sie han sich abgered, sie were die Weiwer mol iwerrasche, wann die in die Roradi gehn. Un sie han sich vorghol, for e Schneeballeschlacht zu sorsche.

Un richtig, am anre Morjet han die Männer schun mit fertiche Schneeballe uf die Weiwer gewart. Wie die am Ecke ankumm sin, sin ne die Schneeballe nor so um die Ohre gsaust. Doch die Weiwer nit faul, sie han sich gedenkt, na ihr Halunke, des kenne mer doch a mache! Un so is die Schneeballeschlacht mit vill Krach un Lacherei anfang, dass die Leit, die wu an dem Ecke gewohnt han, ganz verschrock sin. Natierlich sin se dann vill zu spot in der Kerch ankumm, doch sie han immer wieder schmunzle misse un han sich nit so recht uf die Mess konzentriere kenne, was sogar de Pharre bemerkt hat.

Was kriet mer zu Weihnachte?

Um die Zeit rum han unser Muttre un Omas sich schun derdriwert de Kopp verbroch, was mer de Kiner un Kindskiner zu Weihnachte schenke soll. Es is getuschelt gin un an eem Owet hat die Mutter verkind: Kiner, morje muss ich in die Stadt fahre. Seid scheen brav un horcht uf die Oma! No han mer schun gewisst, dass die Mutter inkaafe fahrt. Un mir han hiner em warme Owe ghuckt un uns naner verzählt, was mer uns vum Chrischtkindl winsche tun.

Was mer sich als Kind selmols gewünscht hat? Die Mädli natierlich e Schlofpupp mit lange Hoor, die wu mer kamble kann un die wu „Mama“ saat. Die Buwe ware meh for Pistole, Autos un Traktore. Vun de Siessichkeite ware immer de Vinga-Tschokoladi un die „Rumflasche“ beliebt. Schachtltschokoladi han mer am liebschte ghat. De hat mer so scheen inteele kenne: Heit e Stick un morje ens....

Vun de Taafghode han die Mädle meischt immer was for die Staffier kriet: scheeni Tischtiecher, e Servies oder Esszeich. Manchmol a e Fillfeder oder e Aktentaschn (mit solche sin mer in die Schul gang). Natierlich war a em Taafpath sei Weib God genennt. Un die hat mit nix zruckstann.